

東  
華  
續  
錄

東華續錄

道光五十

臣王先謙敬編

臣周瀚蕃恭校

秋七月丙寅諭軍機大臣等據琦善等奏西藏駐防弁兵原係三年一換例准雇役番婦代司縫紉樵汲迫後留防過多更換日少該弁兵姦生之子在營食糧者見已十居二三兼之因差來藏之弁兵並無留防之例亦准留藏候補竟有待至二三年方得輪補缺糧各弁兵日形苦累等語內地赴藏駐防弁兵原以備緩急之用此時若照例查辦自必驟加厲禁恐難相安然仍舊因循年復一年不但帑項有虧且恐在營弁兵漸成唐古特族類儻偶有事端難資得力此事甚有關繫自當漸次裁革著該大臣等嗣後遇換防之期卽行照例更換少准留防其有欠項者酌量給發俾令

餉口有資餘均盡數扣還如遇兵糧缺出卽著慎加選擇凡身家不清者概不准其挑入並著揀擇兵丁若干名暫留琦善署中勤加教練以收實效而杜弊端○癸酉前任兩廣總督祁墳卒予祭葬諡恭恪予其子員外郎之銓服闋後卽補知州之鏐卽選○甲申湖南耒陽縣首逆陽大鵬就擒檻送京師伏法○戊子湖北荊州萬城隍溢命裕泰堵治之並撫卹災民○庚寅諭布彥泰等奏墾復荒地勘估興工一摺開墾地畝必先講求水利來源暢旺則灌溉有資見在惠遠城東阿齊烏蘇廢地據該將軍親往周歷相度可以墾復十萬餘畝擬引哈什河之水以資貫注將塔什鄂斯坦回莊舊有渠道展寬加深卽接開新渠引入阿齊烏蘇東界並開段酌空支渠俾新墾之田便於澆灌所議均屬合宜該將軍等卽飭承辦各員認真妥辦務在因地制宜順流利導以期經久有

益仍著該將軍等隨時前往查驗督催毋任稍有意玩其應需工費見據勸諭捐辦著俟全工告成後由該將軍等查明捐工出力各員覈實保奏候朕施恩○辛卯調舒興阿爲工部右侍郎關聖保爲兵部右侍郎○是月加給河南中牟等九縣水災三月口糧貸陝西葭州雹災籽種緩徵江蘇陽湖等十縣歉收逋賦

八月丙申免浙江江蘇失事文武員弁死罪遣戍新疆○辛亥命寶興拏辦四川咽喉匪○癸丑開聖保以病免調倭什訥爲兵部右侍郎以福濟爲盛京兵部侍郎

由左副都御史遷

○丁巳移湖南鄱縣干

總駐耒陽縣撥外委一駐鄱縣○己未裁江甯龍江關查驗木植

稅局○是月賑山西汾陽縣水災雹災並蠲緩汾陽等三縣額賦

九月丙寅命河南本年恩科武鄉試改於來年二月舉行○乙酉

永定河漫工合龍○申嚴武弁乘轎禁例○丁亥添設奉天捕盜

千總把總各三經制外委六虛頂外委十二撥馬步兵隸之○庚寅諭禧恩奏酌減捕打冬圍兵丁一摺盛京每歲冬閒進鮮既已裁減過半所有捕圍兵丁自宜量爲酌減著照所請捕圍兵一千三百名自本年起減去三百名仍按年派前鋒馬甲一千名捕打貢鮮以資操練○是月給河南淮南甯等三縣水災口糧緩徵陝西府谷縣浙江德清武康二縣水災蠲賦貸款

冬十月甲午朔實授張澧中刑部右侍郎○丁酉諭載垣等奏五輅五乘不堪陳設請旨可否修理之處五輅五乘旣已年久損壞著暫緩修理無庸陳設○戊戌賜張殿華等八十四人武進士及第出身有差○壬戌諭軍機大臣等前因阿克蘇和闐等處辦理墾荒酌給回戶承種並據烏什辦事大臣奏請裁屯撤兵節經諭令達洪阿親往查勘會同布彥泰妥議具奏茲據達洪阿奏舊疾

復發難就痊已明降諭旨准其開缺回籍調理矣阿克蘇等城  
民回雜處見在開墾荒地若令民回認種究竟能否相安及酌給  
回民承種日後有無流弊之處必須另行派員親歷各該城體察  
情形熟籌定議伊犁前辦開墾事宜經該將軍奏明委林則徐查  
勘辦理尙爲妥協著卽傳諭林則徐前赴阿克蘇烏什和闐周歷  
履勘並著布彥泰選派明白曉事之協領一員隨同前往勘視仍  
由該將軍察覈情形斟酌議定奏明辦理再本日據常清奏查出  
庫車可墾荒地捐廉興工請給無業回子承種等語著一併交林  
則徐就近往勘由該將軍覈明具奏務期日久相安毋啓爭占之  
弊○癸亥以舒興阿爲伊犁參贊大臣轉阿靈阿爲工部左侍郎  
訥花沙納爲工部右侍郎倭什訥爲禮部右侍郎福濟爲兵部  
右侍郎由盛京兵部侍郎調○是月賑直隸霸州永清二州縣旗民給奉天

錦州等八州廳縣水災口糧蠲緩直隸霸州等三十七州縣奉天  
金州等八州廳縣湖北沔陽等二十九州縣衛水旱災蠲災新舊  
額賦緩徵山東臨清等四十八州縣衛並官臺場鹽江西南昌等  
二十四縣湖南澧州等十州縣河南鄆陵等十四縣安徽無爲等  
三十八州縣衛水災旱災雹災新舊額賦

十一月甲子朔以廣林爲盛京兵部侍郎

由左副都御史遷

○庚午飭拏

畏蘆私梟並封禁沿海私灘○己卯諭前因查庫御史銀庫司員  
罰賠庫項於限內及展限後陸續全完降旨交軍機處存記每屆  
限時奏明請旨茲據開單呈覽所有歷任查庫御史已革刑部侍  
郎黃爵滋著以員外郎用已革頭等侍衛那瑪善已革太常寺少  
卿成觀宣均著以主事用已革降調鴻臚寺少卿孫日宣已革降  
調御史殷德泰均仍著革職歷任銀庫司員已革江蘇松江府通

判薩克慎著以九品筆帖式用已革員外郎富通著以七品筆帖式用已革降調三庫檔房主事奎弼仍著革職○甲申 上詣

大高殿祈雪○是月貸盛京金州水師營歉收口糧緩徵陝西葭州等九州縣江蘇高郵等五十八州廳並淮安九衛甘肅狄道等二十二州廳縣山東朝城縣河南睢州等十五州縣兩淮板浦等十四場水旱災新舊額賦展緩廣東南海等六縣水災通穀

十二月癸巳朔 上再詣 大高殿祈雪○丙申諭前因甘肅省荒地較多特降旨令鄧廷楨親歷周勘設法招墾茲據奏稱各屬履勘完竣計共查出荒熟地一萬九千四百餘頃又番貢地以段折畝一千五百餘頃又甯夏鎮馬廠歸公地一百餘頃分別差等酌量升科該藩司奉派專辦所到之處勸諭詳明妥速蒞事甚屬可嘉著加恩賞換二品頂帶並交部議敘其隨帶委員及各州縣

著擇其尤爲出力查地較多者詳明該督酌量保奏候朕施恩毋

許冒濫○己亥以廣昌爲左副都御史

由太常寺卿遷

○辛丑 上詣

大高殿祈雪○甲辰雪○丙午實授璧昌兩江總督○戊申命卓

秉恬爲體仁閣大學士調陳官俊爲吏部尙書協辦大學士以杜

受田爲工部尙書祝慶蕃爲左都御史轉何汝霖爲戶部左侍郎

調賈楨爲戶部右侍郎周祖培爲工部右侍郎以馮芝爲禮部左

侍郎

署禮部侍郎

○甲寅諭禮部奏遵旨查議一摺趙景賢籍隸歸安

在烏程考試入學中式實屬有違定例著卽革去舉人免其治罪  
趙炳言自行檢舉著加恩改爲交部察議至學政全書所載同省  
異府同府異縣不准冒籍入學其同城異縣是否准其通考之處  
並無明文應如何酌定章程著禮部妥議具奏又另片奏籍貫舛  
錯者限一年內自行呈明等語著照所議辦理○是月加給河南

睢州等十五州縣被災口糧並貸籽種倉穀貸江南駐防兵丁江蘇各營兵匠銀米○是歲朝鮮暹羅人貢○會計天下民穀數除福建未據冊報外各省通共大小男婦四萬一千九百四十四萬一千三百三十六名口各省通共存倉米穀二千二百三十七萬九千八百一十四石二斗七升八勺

東華續錄

道光五十一年

臣王先謙敬編

臣周潤蕃恭校

道光二十五年乙巳春正月乙丑諭本日據鍾祥等馳奏中牟大  
工合龍日期一摺此次興辦大工責成鍾祥鄂順安專心督辦節  
據該河督等將辦理情形隨時奏報至上年十二月十八日啓放  
引河黃流東注甚爲暢順茲據奏稱於二十四日兩壩同時挂纜  
料土並進追壓至底復因水勢湧激間有刷墊竭兩晝夜之力趕  
飭搶辦所築埽占一律高整穩實大工合龍金門斷流全溜悉歸  
故道暢達東趨順軌安瀾此皆仰賴 天 神加佑俾於春前一  
律蒞工朕慶幸之餘倍深寅感發去大藏香十炷著鍾祥虔赴工  
次各處 河神廟代朕敬謹祀謝以答 神庥鍾祥鄂順安辦理

得宜迅速蒞事洵爲不負委任均著加恩賞還二品頂帶並賞戴  
花翎其從前革職處分悉予開復仍各賞加二級准其隨帶慧成  
等在工差委各著勤勞慧成著加恩以六部員外郎用麟慶著以  
四品京堂用牛鑑著賞給七品頂帶其餘在工出力員弁並著該  
河督等覈實保奏候朕施恩毋許冒濫見在大工甫經告蒞善後  
各工均關緊要仍著鍾祥等督飭各員弁妥協辦理務須慎益加  
慎以期全工穩固永慶安瀾慧成麟慶著俟善後各工全竣再行  
來京牛鑑俟經手事件完竣後再行來京○庚午孫善寶以病免  
調李星沅爲江蘇巡撫惠吉爲陝西巡撫以程祜采爲漕運總督  
黃恩彤爲廣東巡撫由布政使遷○王申調傅繩勛爲廣東布政使以  
蘇彰阿爲雲南布政使徐澤醇爲湖南按察使由江南河道遷○乙亥  
改廣東惠州府海防同知爲廣州府虎門屯防同知廣州府永甯

通判爲惠州府海防通判○庚寅諭向來派往朝鮮使臣隨帶通官每至五六員之多因思朝鮮職貢往來語言熟悉通官本可酌減且恐該通官等隨至該國或有騷擾需索等事非所以示體恤此次冊封朝鮮王妃之使臣著隨帶通官一員嗣後凡遇派往朝鮮使臣均照此辦理該部卽纂入則例永遠遵行○是月給直隸霸州永清二州縣災民口糧貸江西德化等五縣湖北江陵等六縣衛湖南沅江安鄉二縣軍民籽種緩徵直隸霸州永清二州縣浙江富陽等十五縣山東臨清等三十州縣衛被災正雜額賦展緩直隸薊州等三十二州廳縣江蘇高郵等三十四州縣衛逋賦浙江橫浦浦東二場被旱蠲課

二月甲午賜鄭國鴻子舉人鐔七品小京官○乙未常大滄以親

老乞養允之以張雲藻爲安徽按察使

由直隸轉

○戊戌諭原任

大學士盧蔭溥持躬清慎品學端醇懋著公忠克孚聞望道光十九年閒曾經降旨入祀賢良祠茲據崇恩題稱德州紳士呈請入祀鄉賢祠允宜特沛恩綸俾資矜式盧蔭溥准其入祀鄉賢祠無庸交部議奏○甲辰禮部奏遵旨另議同城異縣考試章程一摺嗣後同城異縣父子籍貫舛錯者著仍照該部前議於文到日限一年內呈明更正如其父已故閒有兄弟異籍者應令各入各籍所生子孫卽以本身之籍爲籍不得復行兩縣通考至初應童試良民祖父並未應試於初屆報考時查明見在所居室廬並取具各結送考旣考此縣無論取進與否以後卽有遷移亦不得復考彼縣至浙江商籍分撥縣學者應如何辦理俾無窒礙之處著由該部咨明浙江巡撫學政詳查聲覆到日再行覈辦尋奏浙江商籍童生查係取進後分撥杭州府仁和錢塘三學以致父子籍貫

未能盡一詞後商籍各生父子異籍者限一年呈明更正其應考  
童生父兄曾撥何縣應從父兄之籍如初次報考以見居室廬爲  
斷卷面註明仁和錢塘字樣各按本籍取進分撥從之○丙午諭  
已革前任駐藏大臣孟保海樸見有被參交審之案孟保係敬徵  
保送副都統海樸係仁壽保送副都統仁壽敬徵均著交該衙門  
照例議處○賞內閣學士景亮副都統銜爲巴里坤領隊大臣○  
丁未諭軍機大臣等據琦善奏參孟保等濫提官物一案已明降  
諭旨將孟保海樸嵩祿解赴四川派文慶馳驛前往會同寶興審  
訊矣所有前任駐藏幫辦大臣鍾方如經過四川境內或業已過  
境著寶興傳旨沿途截留飭回四川歸案質訊○以鄭祖琛爲陝  
西布政使陝西布政使○癸丑諭前因仁壽敬徵濫保孟保等堪勝副  
都統有旨交該衙門議處茲據該衙門照濫舉匪人例議以降二

級調用副都統爲二品大員該王大臣等遵旨特保宜如何加意  
遴選覈實秉公以期收得人之效乃仁壽等不知慎重濫舉劣員  
率行充數部議降調實屬咎無可辭仁壽著退出內廷行走革去  
宗正領侍衛內大臣仍折罰王俸六年半不准抵銷敬徵著革去  
協辦大學士戶部尙書都統以內閣學士候補仍留總管內務府  
大臣以爲濫舉匪人者戒○命兩廣總督耆英協辦大學士調賽  
尙阿爲戶部尙書裕誠爲工部尙書以文慶爲兵部尙書成剛爲  
左都御史調花沙納爲戶部右侍郎福濟爲工部右侍郎以瑞常  
爲兵部右侍郎由內閣學士遷○甲寅諭道員職銜葉仁前於海疆捐輸  
案內奏請以道員選用並賞戴花翎當因原犯案情較重降旨著  
不准行並將所捐銀兩給還此次復捐輸鑄礮經費該撫奏請可  
否賞戴花翎之處仍不准行所捐銀兩著卽發還○乙卯劉鴻翱

以病免調惠吉爲福建巡撫以鄧廷楨爲陝西巡撫○丙辰諭貝勒縣偲本年七十生辰因思朕之伯叔兄弟自幼同朕在上書房讀書者見在止有該貝勒一人允宜特沛殊恩縣偲著賞穿四團龍補服用示朕眷念宗親有加無已至意

三月乙丑諭軍機大臣等著英等奏北爾日客國領事蘭瓦呈請貿易有佛蘭西夷使刺萼尼來信代爲薦引並查明該國卽係曾經來粵通商之比利時國等語該國停市已久此次應否暫准貿易所請五口貿易章程應否一體頒發著該督體察情形悉心妥酌辦理○戊寅予前任陝西布政使陶廷杰四品頂帶休致○己卯以敬徵齡鑑俱爲內閣學士兼禮部侍郎銜俱候補內閣學士○辛巳復江蘇儀徵抽收江廣漕船米稅例○壬午申命寶興嚴緝四川教匪○是月貸山西忻州府十七州縣廳歉收倉穀並展緩保德

等州廳縣貸穀

夏四月乙未諭戶部奏罰賠庫貯銀兩案內續報病故各員名其  
接續承追之子孫可否酌予限期原任大學士曹振鏞罰賠減半  
銀兩經伊子曹恩溙呈繳過銀一萬二千兩曹恩溙見已身故應  
在伊孫曹紹桐名下追繳因念曹振鏞由大學士在軍機大臣上  
行走多年人品端方趨公敬慎所有未完銀一萬二千七百五十  
兩著加恩免其追繳至構代賠伊祖縣昌減半銀兩係接續承追  
之孫著於原限之外推展六箇月責令依限完繳嗣後如有接續  
承追各員均著照此辦理○辛丑壽恩固倫公主下嫁世襲一等  
公故工部尙書博啓圖子景壽○癸卯申諭直隸山東河南各督  
撫飭拏教匪盜匪○召桂良來京以賀長齡爲雲貴總督由貴州  
巡撫遷  
○甲辰調吳其濬爲福建巡撫惠吉爲雲南巡撫○以喬用遷爲

貴州巡撫潘鐸爲山西布政使劉喜海爲四川按察使

由陝西延榆綏道遷

○乙巳賞廣東陣亡副將陳連陞子起鵬舉人○丙午 上詣

黑龍潭祈雨○戊申 上臨壽恩固倫公主園○壬子富呢揚阿

卒以惠吉爲陝甘總督鄭祖琛爲雲南巡撫

由陝西布政使遷

○乙卯賜

蕭錦忠等二百十七人進士及第出身有差○丙辰論前因兵部

堂官違例派署掌印又於司員索詐書吏吸煙並不據實奏辦當

交部分別嚴加議處茲據吏部都察院會議具奏前任兵部尙書

裕誠許乃普左侍郎道慶朱嶠派署候補主事署掌印銓三年之

久不行改派又於伊琳索詐書吏吸煙並不據實奏明本應照議

革職姑從寬改爲實降五級調用前任兵部右侍郎惟勤祝慶蕃

違例派署掌印後旋經調任著加恩改爲革職留任八年無過方

准開復前任兵部右侍郎福濟署兵部右侍郎周祖培奏不實

著改爲革職留任前署兵部右侍郎舒興阿侯桐前署兵部尙書

陳官俊前任兵部右侍郎倭什訥兵部右侍郎瑞常前署兵部左

侍郎趙光於恩麟派署掌印均未能查明更正舒興阿侯桐又失

案司員得受陋規著照議降四級留任陳官俊倭什訥瑞常趙光

著照議降三級留任俱不准其抵銷兵部員外郎王鍾著照議降

一級留任再罰俸一年不准抵銷○以何汝霖爲兵部尙書敬徵

爲工部尙書○戊午以朱鳳標爲內閣學士兼禮部侍郎銜

由翰林院○庚申諭刑部奏查出山西司積壓文書不辦據實檢舉

傳諭學士遵此案該司書吏收到文書延閣不辦殊出情理之外著派卓秉恬

賽尙阿徹底根究據實具奏刑部堂官著先行交部嚴加議處

五月辛酉朔雨○壬戌諭軍機大臣等布彥泰奏英吉沙爾卡倫

被布魯特滋擾情形一摺據稱接准奕經知照英吉沙爾卡外有

布嚕特多人撲入圖木舒克卡倫並有布嚕特傳牌分撲各卡到城見面之語查係阿克蘇和闐葉爾羌喀什噶爾等城大阿渾句結卡外布嚕特滋事見派員馳往偵探等語該布嚕特等膽敢撲入卡倫戕害兵丁並有各城大阿渾句結之言必應迅速勦辦不可稍事遷延致使滋蔓著布彥泰探訪確情該布嚕特等究竟因何起釁賊匪共有若干所撲卡倫共有幾處如果賊勢猖獗需兵接應該將軍或自行帶兵前往或派得力將弁馳往應援均著體察情形妥爲斟酌一面相機辦理一面迅速奏聞該將軍仍當知照各城嚴守卡倫一律防範如布嚕特闖入滋擾卽行協力兜擒毋得稍有疏虞○以李嵩爲左副都御史

由通政使遷

○乙丑諭軍機

大臣等前據布彥泰奏英吉沙爾被布嚕特滋擾情形當諭令該將軍探訪確情斟酌辦理茲據奕經等奏稱英吉沙爾喀什噶爾

均經派出伯克帶領回兵在索胡魯克射斃賊匪二名擒獲多名  
見在該賊匪等業經遠竄地方安靜等語此案該布魯特等糾眾  
滋事旋即解散辦理尙爲迅速惟賊情詭詐城卡各處仍宜加緊  
嚴防不可以賊匪竄逸稍涉大意致有疏虞至起釁緣由最關緊  
要著該大臣等將見獲各犯嚴行訊鞫務得確情毋許稍有不實  
不盡該匪等傳牌聚眾稱係各城大阿渾等勾結滋擾是否實有  
其事尤須查訊明確分別辦理著該大臣等一面撫諭該大小阿  
渾等務須明白開釋各令相安毋任稍存疑貳是爲至要至該布  
魯特與阿奇木信紙內稱因愛里雅爾殺過多人是以滋事是否  
果係實情並著詳細究明毋令含混其英吉沙爾巡東旣無賊匪  
臨近情事該兩臺弁兵何得忽然退避以致文報不通殊出情理  
之外務卽確切查明從嚴懲辦○己巳諭前據布彥泰勘明庫車

開墾地畝一摺當交軍機大臣會同戶部議奏茲據嚴議具奏著  
卽照所議辦理因思回疆各城開墾荒地朕意原以內地民人生  
齒日繁每有前往各城營生謀事者如能將此項荒地招致回民  
承種則地無曠土境鮮遊民日久可成土著俾得安所樂生原非  
爲該處回民另籌生計所以初降旨時有查明具奏之語乃各城  
隨奏隨辦皆係輯瑞作俑以致共相效尤見在庫車地畝既據全  
慶等往勘請給回子承種納糧復經布彥泰覆奏自係因地制宜  
惟事當初始不可不豫防流弊著布彥泰體察各處回情如有勒  
索苦累情事卽不可強以所難稍存遷就○甲戌前任戶部尙書  
吳椿卒○戊寅以蔣文慶爲安徽布政使李瀚通爲浙江按察使  
由兩淮鹽運使遷○己卯命刑部清釐庶獄○辛巳諭軍機大臣等奕經  
等奏拏獲滋事逆犯究明起事根由一摺覽奏均悉此案首逆胡

完卽布孜爾罕因幼時從母依隨張逆竟以逆裔自居事隔多年  
仍復蓄志報復且自稱和卓以圖煽惑勾結情罪重大著該大臣  
等派委妥員卽將該逆布孜爾罕及見在捕獲從逆各犯內緊要  
人犯一併解赴伊犁交布彥泰舒興阿嚴審定擬具奏其要犯阿  
瓦斯阿布都色邁提據報中槍落水果否屬實仍著詳細查明毋  
令稍有含混逸犯提拉等嚴飭迅速按拏務期遺孽肅清勿滋後  
患此次該逆等糾眾撲卡經該伯克等率眾奮擊擒斬多名並將  
首犯卽時拏獲甚屬可嘉著擇其尤爲出力者酌量保奏候朕施  
恩○申命各直省清釐庶獄○丙戌雨○丁亥 上再詣 黑龍  
潭祈雨○戊子諭刑部山西司書吏陸靈皋於清字公文積壓多  
件延不呈司籤到實屬膽玩僅予杖徒尙覺輕縱陸靈皋著杖一  
百流二千五百里先於刑部衙門前枷號一箇月示眾以昭炯戒

該司譯漢筆帖式委署主事壽山不諳清文以致積壓文書不辦實屬庸劣無能著卽行革職發往軍臺效力贖罪所有道光十五年  
起歷任山西司承辦司員著交部查取職名分別嚴加議處其  
原派不諳清文筆帖式壽山作爲委署主事之刑部堂官及歷任  
刑部堂官均著交部分別議處○是月給山東樂安等六縣水災  
口糧並緩徵壽光等七縣新舊額賦

六月癸巳以馮德馨爲廣西按察使

由山西河東道遷

○甲午諭軍機大

臣等者英等奏北爾日客國商船爲數無多今旣遣領事蘭瓦求  
請照舊通商且據佛蘭西代爲請求蘭瓦見在小呂宋候旨五月  
內卽可赴粵著俟詢查明確後卽將五口貿易章程一體頒發以  
示懷柔○詔停本年秋決○丙申諭軍機大臣等本日據訥爾經  
額奏稱東省捻匪夥黨眾多慮被查拏蟻聚不散爲拒捕之計業

據該撫飭令曹州鎮派官帶兵分往濮州鄆城兩路勦捕濮州鄆城鉅野定陶城武等州縣各派捕役多名隨同官兵在王家樓地方與賊接仗等語捻匪糾眾拒捕恣行不法必應及時勦辦其直隸山東連界各屬尤恐此拏彼竄著崇恩接奉此旨卽督飭員弁選派兵役並飭曹州鎮務與直隸所派員弁協力兜拏總期羣匪不至漏網地方日就肅清是爲至要○以李嘉端爲內閣學士兼禮部侍郎銜

由少詹事遷

○甲辰命前任貴州布政使李象鵬以三品

京堂候補○丙午諭前據御史楊錫庚奏請飭覈對文簿以免積壓當有旨交各衙門堂官悉心議奏節據各該衙門分別情形或量爲變通或照舊辦理均經定議具奏各衙門文移往來皆有簿冊可憑如果實力稽查何至有延闕不辦之事見旣據議立章程嗣後著各照所議責成該司員等詳細覈對認真辦理其有已發

咨移而承辦衙門日久未辦者內而大小衙門外而督撫均著將所發文移註明月日一體查催庶由何處捺閣不難從此根究立予嚴懲經此次嚴論之後如該司員等仍敢漫不經心任令不肖書吏將所收文移延閣科房並不稟請標畫司到以致積壓日久不行辦稿一經發覺卽將本任專管之司員革職永不敘用其承行書吏立即鎖拏交刑部治罪儻查係該司員有心捺閣通同舞弊卽將該司員書吏一併拏交刑部治罪並將該堂官等照例議處其各懷之○丁未申定蠲緩恩詔徑由藩司頒發各縣例○戊午諭軍機大臣等有人奏廣州府屬盜劫日滋商民受害請設法整頓一摺據稱廣州府一帶土匪劫掠爲生結黨聚會數萬餘人其著名積匪如香山新會順德等處姓名皆歷歷可數上年查拏之卧龍三合等會匪搜捕未淨嗣復有新安新甯各縣匪徒在香

山之港口及隆都鄉引入會千百爲羣肆行無忌又香山下沙地面近來匪類漸多地方文武不肯實力查拏以致農民不安耕作又順德香山交界之處及南海番禺東莞順德香山新會三水等處皆有盜賊巢穴出沒無常搶劫多案香山縣城內外自上年冬至今年春夏之交報劫者不下數千案皆有事主名姓地方及被劫月日可查並有香山司巡檢魯鳳林被盜搶去剃鬚勒贖等語似此盜劫橫行總由地方文武相率因循以致肆行無忌甚至持械戕官擄官勒贖殊堪駭異著耆英黃恩彤督飭所屬員弁按照摺內所指各案及盜匪姓名確切查明按名拏獲究辦並寬籌緝捕經費嚴定賞罰章程務使盜賊肅清農商安靖○己未江蘇中河廳桃源汎河溢命潘錫恩堵治之○諭軍機大臣等德興奏總兵循例出口會哨途次突遇番賊打仗被戕陣亡親派將領前

往緝捕一摺西甯口外察罕鄂博地方乃番賊往來之區節經定有章程由甘涼西肅各提鎮於每年六月酌帶弁兵會哨一次本年會哨屆期西甯鎮署總兵慶和於六月初九日自西甯郡城啓程出卡乃於六月十二日行至離察罕鄂博三十餘里之金羊嶺地方突見番賊多人該署鎮督兵奮勇追捕至地北靛溝賊番愈多官兵單弱力難抵敵該署鎮身帶重傷卽時殞命所帶官兵陣亡亦多連年番匪屢搶沿邊居民今復聚眾戕害總兵大員殺傷弁兵必應痛加勦辦德興見因布哈河沙爾哈地方有番賊二千餘人若親身帶兵前赴山北轉恐勢難兼顧已選派營員帶兵按捕著惠吉接奉此旨卽星馳前赴甘肅體察情形相機妥辦惠吉未到任以前卽著鄧廷楨酌調官兵交胡超帶往勦辦並著胡超馳抵該處詳察賊勢分路追捕總期悉數殲擒不至逃竄稽誅是

爲至要至西甯鎮總兵站柱應行交卸來京該處見乏帶兵大員  
著暫緩給咨飭令回任以便差委署總兵慶和爲國捐軀情殊可  
憫著交該部照總兵例議卹所有陣亡官兵數目並著該督等查  
明具奏○是月緩徵山東濱州等四十二州縣衛被災逋賦山東  
永阜等四場被淹灘地鹽課

東華續錄

道光五十二

臣王先謙敬編

臣周瀚蕃恭校

秋七月辛酉諭欽天監奏恆星表卷告成繕本呈覽著命名儀象考成綱編分修以下官生交部分別議敘○癸亥以孔繼尹爲廣西布政使嚴良訓爲廣東按察使

由甘肅鞏秦階道遷

○甲子諭軍機大臣

等文慶等奏會訊孟保等濫提官物一案審出大概供情一摺此案孟保那移官物嵩祿印給空票皆須研訊明確以成信讞該革員等見在所供恐有不實不盡著文慶寶興廉敬俟本案人證解齊逐細嚴鞫務期水落石出毋任稍有掩飾狡卸鍾方仍著暫行留川俟全案審結時奏明請旨尋奏孟保訊無侵蝕官物情弊惟屬內零星那用之項未及買補亦未明立文案嵩祿於弁兵等應

領賞需印給空票復因捐賞購買不及那用官物雖訊據事後彌補究屬侵冒應照例將孟保嵩祿等發往新疆充當苦差下部議尋議上得旨此案孟保等擅用官物並未明立文案雖屬冒濫爲數尙屬無幾所有前經查鈔之孟保海樸嵩祿等家產均著給還○以程煥采爲湖北按察使由鹽道遷○戊辰以全慶吉明俱爲內閣學士兼禮部侍郎銜全慶由喀喇沙爾辦事大臣吉明由詹事遷○辛未諭軍機大臣等據耆英等奏丹麻爾國呈請設立領事發給通商章程稅則等語丹麻爾國既係向來通商之黃旗國貿易最久並未閒斷見請設立領事發給章程稅則係爲安分貿易起見事屬可行著卽准其設立領事經理一切並頒給通商章程貨物稅則俾有遵守該督等務卽轉飭該領事於該國商人妥爲約束毋得稍有販私漏稅情事致滋弊端○命大學士卓秉恬管兵部事○癸未諭軍機

大臣等鄧廷楨等奏官兵節次捕擊番賊見在提鎮分駐要隘會合剿辦一摺覽奏俱悉賊番分股肆擾經官兵等協力攻剿先後殲斃多名已將賊匪壓退惟番情叵測聚散靡常此次賊數不過二千餘人而忽分忽合忽東忽西爲牽制官兵之計必須偵探賊蹤出其不意相機剿捕勿任竄伏遊奕見在胡超帶兵馳抵永固距察罕鄂博僅止一百餘里與站柱聲息相通乘此官兵會合之時務當一鼓作氣於賊番往來要隘堵截剿擊尤當設法斷其後路俾不至竄歸巢穴空勞兵力至番賊窺伺羣科此時是否解散著德興駐紮丹噶爾督率官兵並蒙古等一併防範毋得稍有疏虞並責成胡超督緝卡內之賊以清北路站柱督緝卡外之賊以清南路其餘防堵接應各事宜俱著照所議辦理○開採廣西恭城縣鉛礦

八月庚寅朔諭軍機大臣等據鄧廷楨奏官兵偵擊賊番得獲勝仗一摺此次賊番向硫磺溝衝突經總兵站柱督率官兵占據山梁殲斃甚眾賊番業已畏懼四散奔逃正當趁其窮蹙之時痛加剿洗該賊番見難逃遁而卧牛河一帶爲向來賊匪出沒之區自應嚴飭防守勿任竄逸並於附近地面悉力窮搜務期淨絕根株此次打仗出力官兵著惠吉查明保奏候朕施恩毋許冒濫其陣亡外委一員及受傷兵丁著與節次打仗傷亡弁兵咨部請卹

○壬辰諭朕勤求民隱子惠元元自御極以來蠲賦緩徵恩膏疊沛所願人安樂利戶裕蓋藏俾閭閻日臻康阜因念各省民欠錢糧自道光十五年降旨蠲免後計期已逾十稔本年恭逢 聖母皇太后七旬萬壽海寓久安民物豐豫允宜推廣 慈恩覃敷闡澤用昭錫類之仁所有各省節年正耗民欠錢糧及因災緩徵帶

徵民穀並借給籽種口糧牛具及潛項蘆課學租雜稅等項著各該督撫將軍府尹等將道光二十年以前實欠在民者詳晰查明該省所屬某州某縣銀穀若干速行開單具奏候朕降旨全行豁免並著先將此旨刊刻謄黃徧行曉諭務使城市鄉村咸喻朝廷德意毋任官吏胥役等延閣侵漁致滋弊竇期吾民休養生息孝弟力田比戶可封催科不擾用副朕延釐篤祐申錫無疆至意○辛丑調鄭祖琛爲福建巡撫梁萼涵爲雲南巡撫吳其濬爲山西巡撫出福建調○敬徵以病免調特登額爲工部尙書以保昌爲禮部尙書○乙卯以趙光祖爲雲南布政使普泰爲雲南按察使由山西歸綏道○丁巳 上臨壽恩固倫公主園

九月庚申諭本年十月恭逢 聖母皇太后七旬萬壽加上 徽

號應躬進奏書 冊 寶並宣表行禮昨恭奉 皇太后懿旨慶

賀儀典過於繁重拜跪需時皇帝春秋已逾六旬自宜節勞以示  
愛護此次慶賀行禮時所有奏書冊寶表文一概毋庸宣讀朕自  
維精力尙強拜跪可以如禮仍請悉循儀典藉展尊敬之忱奏懇  
再三未邀 俞允仰見 聖母垂愛惓惓無微不至若不祇遵

溫諭轉非所以上體 慈懷此次恭進奏書 冊 寶及慶賀表

文均卽恪遵 茲訓毋庸宣讀著諭知該部敬謹遵行○諭吏部  
奏酌議委員審案出力議敘條例等語嗣後各省命盜等案委審  
官能將原問官審擬錯誤有關生死出入大案究出實情改擬得  
當者卽照審轉官例一體送部引見如原問官擬罪有關出入無  
關生死委審官平反得實者每案准其紀錄二次如原問官擬罪  
並無出入止於未能審出實情委審官研訊得實者每案准其紀  
錄一次均由該督撫於定案時將何官錯誤何官改正之處隨案

聲明辦理其並無平反僅止研訊出力者如係案情重大人犯眾多該委員果能秉公細心妥速研鞫實在出力仍准該督撫保奏並著將該委員如何出力之處詳細敘明不得以委審出力空言聲請致滋冒濫○己卯諭漕糧爲天庾正供節經降旨令有漕各省督撫嚴飭所屬早兌早開剋期渡黃毋稍延誤乃近年重運漕船不能如期抵壩以致到通歸次兌受新漕節節耽延總緣各該督撫不肯破除情面實力催趲所致上年軍船回空無須倒塘灌放猶未能十分迅速況本年因中河桃汛漫口繞越北行已耽延十有餘日繼又因運河淺阻剎運抵通更形遲滯若不趕緊催趲及早歸次儻誤新漕受兌關繫非輕見已節屆霜降水勢漸消著漕運總督及沿途各督撫分飭所屬嚴行催趲務使連檣南下銜尾進行不准片刻停留庶幾以速補遲如期歸次來年新漕尤當

趕緊辦理按限兌開統限於四月初十日以前全數趲至清江剋期抵壩以便渡黃北上毋許稍有延誤儻意存怠玩視爲具文仍致臨事周章有逾例限定將該漕督及各該督撫嚴行懲處決不寬貸○庚辰諭軍機大臣等梁寶常奏匪徒聚眾抗官見在調兵勦辦情形一摺浙江奉化縣匪徒張名淵等於該縣考試時聚眾阻鬧挾制完糧減價經該道等前往彈壓輒敢抗拒官兵形同叛逆實屬目無法紀見經該撫飭委署臬司蔡瓊帶兵前往查辦並據提督詹功顯選派參將百勝帶兵前赴該處相機勦辦該縣山海交錯難保該匪徒等不勾結他處賊匪附和成羣藉圖搶擄自當厚集兵力趕緊撲滅著梁寶常帶印會同詹功顯星夜馳往查辦並准就近酌調得力鎮將前往以備調遣務將爲首各要犯張名淵等悉數擒獲毋許一名漏網至該縣王濟因何辦理不善澈

成事端該府李汝霖於有事之時遽爾告病顯有規避情事並著  
確切查明據實參辦毋稍徇隱○乙酉諭軍機大臣等惠吉奏百  
灰關等處兩次追捕番賊情形並見在嚴催投勦等語此次賊番  
滋擾倏聚倏分官兵分路追捕總未能大加痛剿見既據報石衣  
關口及噶麥打坂兩次遇見番賊著嚴飭該鎮站柱等確探賊番  
蹤迹趕緊跟追毋得稍有遷延仍令遠竄轉瞬大雪封山官兵既  
難深入且河冰凍結更易偷渡滋擾其沿邊各卡隘口應如何分  
布弁兵嚴加防守及春融以後應如何豫爲籌備以防乘隙肆擾  
之處著惠吉通盤籌畫妥速布置先行奏聞至提督胡超統兵專  
辦既有應捕番賊自應迅速搜剿何以該督飛令趕赴西路尙未  
具報起程亦著惠吉查明據實具奏尋奏見飭站柱及沿邊營汛  
逐處排搜不遺餘力查西甯一帶黃河已經凍結應飭該鎮酌撤

弁兵分守本境一俟春融卽與達洪阿妥爲籌備胡超因染患瘴  
癘尙須調治並據站柱咨報大股賊匪業經斂迹是以未卽起程  
報聞○丙戌諭布彥泰奏查勘開墾事務將次完竣等語前據該  
將軍奏稱林則徐於伊犁開墾阿齊烏蘇地畝案內捐辦要工嗣  
因新疆南北各城開墾事務疊經降旨派令林則徐同全慶前往  
履勘茲據布彥泰奏各城開墾九十月間卽可全局完竣林則徐  
自飭派查勘以來自備資斧效力奔馳將近一載著有微勞著飭  
令回京加恩以四五品京堂候補○戊子免玉舒番族積欠馬貢  
銀○是月緩徵盛京新民等五廳縣水災山東濟甯等四十四州  
縣衛歉收新舊額賦蠲緩山西徐溝和順二縣被水被雹額賦  
冬十月辛卯賜吳德新等六十九人武進士及第出身有差○癸  
巳封成貴人鈕祜祿氏爲 成嬪○甲午以 皇太后七旬萬壽

加上 皇太后徽號曰 恭慈康裕安成莊惠壽禧崇祺皇太后

○丙申諭梁寶常奏查明奉化縣匪徒滋事緣由並見辦情形一摺奉化縣匪徒張名淵等因所控糧案未結輒敢聚眾阻考毆辱委員焚搶民舍提督詹功顯迅卽撥兵派令參將百勝都司鄧鳳翔帶領赴援旋將匪徒擊散見在倉庫監獄未動該匪徒出城以後各鄉附和之徒漸次散去惟唐畧汪家村等莊尙聚多人計圖抗拒經該撫調兵往剿該匪徒等事起倉卒勢頗猖獗該提督撥兵迅速調度有方百勝等奉派救援奮勇前進以致身受重傷均屬可嘉詹功顯百勝鄧鳳翔俱著交部從優議敘其傷亡弁兵著該撫查明照例咨部議卹該縣知縣王濟先因增加糧價釀成京控該府李汝霖審訊此案輒復擅責生監以致人心不服又於有事之時遽爾告病顯有規避情事李汝霖王濟均著卽行革職拏

問交該撫嚴訊具奏甯紹台道陳之騷前往該處不能彈壓撫諭  
因匪黨眾多輒行避匿實屬懦怯無能陳之騷著暫行革職該撫  
惟當會同該提督督率將弁將未散匪徒迅速撲滅剋日蕆事其  
著名匪犯張名淵趙順年等務須按名拏獲審明嚴辦以伸國法  
而淨根株○左副都御史廣昌以大朝失儀降二級調用○戊戌  
皇太后七旬聖壽節 上率 皇子及王公大臣行慶賀禮

御製 聖母皇太后七旬萬壽賦並序○諭軍機大臣等賀長齡  
奏查明永昌府屬回匪滋擾情形見籌捕勦等語該回匪等因教  
習拳棒被縣查拏疑爲漢民舉發輒敢糾眾報復節經設法開導  
仍復堅持相抗擾掠附近村寨實屬頑梗異常見據該督飭委迪  
南道周澍會同提督張必祿嚴密堵禦相機勦捕務須諄飭該道  
等斟酌情形妥慎籌辦毋任稍有疏縱亦不得過涉張皇總期邊

防永謐漢回相安方爲妥善○辛丑李宗昉以病免以祝慶蕃爲

禮部尙書魏元烺爲左都御史

由刑部左侍郎遷

○壬寅調周祖培爲刑

部左侍郎以張芾爲工部右侍郎

由內閣學士遷

○癸卯以恭上皇太

后徽號禮成頒詔天下覃恩有差○丙午諭前據訥爾經額奏請

將旗租積欠並補徵銀兩一體豁免當交戶部議奏茲據該部奏

稱旗地佃欠與民糧不同礙難議准等語此項佃種旗地之民近

隸畿疆同深望澤所有直隸各州縣道光二十年以前民欠各項

旗租並補徵銀兩著加恩一體豁免以普仁施○丁未諭軍機大

臣等梁寶常奏奉化縣匪徒經該撫曉諭業經解散並據該縣矜

耆及居民等縛送滋事匪徒額求免剿首犯張名淵等亦各赴案

投首各處村莊一律肅清前調官兵分別撤回等語所辦甚好惟

首要各犯甚多其投首縛獻者僅十餘名未獲各犯著卽設法接

拏務使悉數弋獲明正典刑毋許一名漏網但不可任聽官弁人等借接捕名色擾及良民餘著照所議辦理○庚戌諭軍機大臣等賀長齡等奏督辦滋事回匪一摺覽奏俱悉該匪等膽敢抗殺兵練焚掠村莊且偏近永昌郡城猖獗已極見經提督張必祿王一鳳等分投帶兵前往勦辦自可迅就撲滅惟永昌毘連順甯雲州騰越等處漢回錯雜順甯之右甸等處爲該回匪後路尤屬緊要該督見已親往督辦著與張必祿王一鳳督率文武激勵將士添派弁兵迅卽兩面兜剿毋任竄擾滋蔓首要各犯務須悉數擒獲勿使一名漏網其安分良民尤當隨時安撫不可稍滋擾累○辛亥諭軍機大臣等賀長齡奏永昌城內住家回民勾結滋事匪犯於黑夜滋擾槍砲齊起經該管文武督率弁兵奮力攻捕將藏伏各匪悉數殲除等語覽奏嘉悅之至地西道羅天池鄧川州知

州恆文遊擊劉桂茂練總沈聚成等同心協力加意隄防當寅夜倉卒之間設法勦捕又能鎮靜不擾使郡城得以保全實爲奮勉出力著該督迅卽查明破格保奏候朕施恩以昭激勸又據探猛庭回匪分糾永平各匪欲攻郡城及金雞哨江橋等處並句結上江老窩各匪鈔掠村寨頑梗已極見在城內兵弱難以分撥著該督等會同張必祿等仍遵前諭迅速添調弁兵扼要勦截兩路夾攻並飭該道等嚴密堵拏務令將滋事各犯悉數擒獲從嚴懲治以伸國法而淨根株○丙辰以慶祺爲左副都御史

由太常寺卿遷

○是

月賑直隸寶坻等四縣災民緩徵直隸薊州等四十州縣安徽無爲等三十五州縣衛湖南澧州等六州縣衛被水被旱新舊額賦兩淮泰州海州十四場鹽課展緩湖北沔陽等二十五州縣衛被水被旱新舊額賦

十一月戊午朔諭前據御史田潤奏前歲西甯會剿番賊富呢揚阿及周悅勝等種種諱飾不實等語當交惠吉鄧廷楨德興確切密查各自繕摺具奏茲據惠吉等逐款查明先後據實覆奏如該御史原奏所稱富呢揚阿將番僧邀至大營面結和約等情據奏並無其事惟當時曾有川番則巴錯洛赴營投誠之事或不免附會傳訛應毋庸議其被搶馬匹攤賠彌補各款雖據查覈數目情形互有不同惟馬匹被搶較多挑變攤賠亦屬弊竇多端厯任該管提鎮大員未能隨時釐剔均著交部先行分別議處其餘經收員弁亦著惠吉詳查職名一併分別參辦其短缺馬匹應如何著落賠補並著惠吉分別擬議另行具奏辦理至富呢揚阿前奏接仗情形雖非盡屬虛無究不免於鋪張粉飾周悅勝以統兵大員並未接仗輒行捏飾入奏若使其身尚在均當重治其罪富呢揚

阿周悅勝見皆身故所有飾終之典一併撤銷周悅勝厥咎尤重並著將前賞太子太保銜及錫予諡號概行追奪以爲欺罔冒功者戒○辛酉陝甘總督惠吉卒予祭葬○以布彥泰爲陝甘總督

由伊犁將軍遷

未到任前賞林則徐三品頂帶先行署理○壬戌諭書元

奏勘明戶民新墾田禾被淹懇恩量予緩徵一摺新疆各城應徵糧石有關兵精歷係按年徵收向無因災緩徵之事茲既據該大臣查明該處戶民甫經安插田地被淹實形疲困姑著加恩將此次欠收糧二千二百石准其緩至道光二十七二十八兩年分年照數帶徵以紓民力新疆地畝與內地情形迥不相同內地分田受種凡高阜低窪之區地無遺利偶遇水旱偏災不得不量行蠲緩至新疆土曠人稀儘多隙地卽見在招民墾種自當詳度形勢擇平原沃壤計畝授田方可因地之宜盡人之力若將濱河低窪

易於受災之地聊且播種使斯民終歲勤動不獲享豐收之利仍以民情拮据奏懇恩施是有名無實殊非朕裕國足民之本意嗣後回疆各城概不得紛紛瀆請妄希恩澤也○癸亥以德春爲泰甯鎮總兵官德誠爲倉場侍郎由泰甯鎮總兵遷○丙寅以黃琮爲內閣學士兼禮部侍郎銜由詹事遷○庚午諭賀長齡奏勦辦永昌滋事回匪連獲勝仗餘匪逃散一摺雲南猛庭寨回匪聚眾劫掠抗殺兵練逼近永昌郡城先經迤西道羅天池等將城中內應回匪殲除淨盡並經該督親往督飭該提鎮等分途堵剿至九月十三日該匪等繞撲金雞右營盤經署騰越營中軍遊擊朱曰恭探知帶兵迎敵被賊放槍中傷左眼該營弁兵回擊將放槍之賊立時斃命該遊擊奮勇撲擊力竭倒地旋經提督張必祿等督率兵練兩路分進隨擊隨追轟斃首匪馬大一名餘匪數十名又進至小松寨

等處連日勦殺該匪棄械退走竄回猛庭乘夜潛逃四散經王鳳等親赴該寨查明僅有舊居回民百餘戶實無匿存餘匪見據該督飭提該寨回民親行訊鞫並嚴緝逸犯其未到之兵均卽截回歸伍等情該督督辦此案妥速可嘉其回匪起釁之由是否實係挾哨民舊嫌激成此變著於回民提到時詳細審訊務得確情妥爲辦理至首匪馬大業經擊斃外其餘各頭目及從逆叛回共有若干名務當設法悉數殲剿毋得稍留餘孽未獲之丁泳年等並著四川陝甘各省一體按拏解往雲南歸案審辦遊擊朱曰恭首先迎敵奮勇捐軀可嘉可憫著加恩照副將例賜卹先後陣亡之高朗沈振源等亦著該部議卹當朱曰恭受傷之時該營弁兵內何人開槍將槍傷該遊擊之賊立斃著該督確查姓名卽行破格保奏候朕施恩都司楊朝勳守備潘惠揚不能出力打仗輒任

令該匪等擁至賊寨復被偪回營代訴所稱各情顯係事後枝梧斷難憑信著卽革職鞫交該督確切審明嚴行定擬具奏尋奏查回匪起釁之由先挾緬甯雲州永昌等處械鬪舊嫌此次復因在板橋哨唱曲譁笑漢民被萬材柱等毆逐拆寺所致朱曰恭受傷之時係馬兵汪海將賊擊斃至楊朝勳潘惠揚因稟請添兵未允轉戰力竭撲地昏迷被賊擁去醒時卽欲自盡無閒可乘被偪代遞稟結回營尙非事後枝梧擬發新疆充當苦差到配枷號兩箇月報聞○丙子諭嗣後親郡王貝勒貝子例應在紫禁城內騎馬者如年至六十五歲俱准其乘坐二人椅轎其文武大臣曾經賞馬者滿洲人員年至六十五歲漢員年至六十歲亦俱准其乘坐二人椅轎以示優恤○庚辰諭軍機大臣等耆英等奏申明要約一摺英兵在舟山數年見當交割接收之期該督親赴香港接

晤各節均堅守條約並無異言惟求進廣州府城一節仍有他日再議之語該督等俟其續請時卽告以貿易之事期於彼此相安今欲更改舊章人心必爲疑怪粵民素稱强悍且恐良莠不齊儻或滋生事端彼此均爲不便如此曉諭庶可經久相安○是月貸熱河圍場歉收兵丁銀緩徵新疆各城浙江定海廳河南睢州等二十六州縣江蘇高郵等六十三州縣衛甘肅狄道等二十二廳州縣山東觀城等三縣災歉新舊額賦山東官臺場被水竈課展緩江西新建等十三縣歉收逋賦

十二月辛卯 上詣 大高殿祈雪○丁酉羅文俊以病免以王

廣蔭爲工部左侍郎

由內閣學士遷

○戊戌諭本年

皇太后七旬萬壽

前經降旨普免道光二十年以前民欠銀糧令各將軍府尹督撫等查明開單具奏據劉韻珂等另片奏請將內地糧米及臺灣府

屬供粟一體豁免當交戶部覈覆茲據查明具奏此次臺灣供粟內地租穀十一萬一千五百八十八石零內地糧米十四萬九千五百二十八石零以上銀米內截至奉到諭旨以前實欠在民未完之項著加恩准其一體豁免該督等卽刊刻謄黃徧行曉諭並照例按戶付給免單嚴禁吏胥影射需索等弊務期實惠及民用副朕推恩布閭至意其所奏借碾倉穀請項買補一節既經該部查明奏銷案內有前經行令撥充兵糈之米二十餘萬石著卽遵照前議抵撥清項餘米仍備兵糈毋庸動項買補期於倉庫兩有裨益民間仍霑實惠○癸卯 上再詣 大高殿祈雪○甲辰以德齡爲內閣學士兼禮部侍郎銜由詹事遷○丁未耆英等奏英人仍執前說要求進城命仍詳細開導○庚戌陳繼昌以病免以徐廣緝爲江甯布政使服闋布政使○癸丑 上復詣 大高殿祈雪○乙

卯諭昨梁寶常奏緝捕遲延及身有疾病各員當經降旨分別摘去頂帶革留勒休內山陰縣知縣方聯孚一員據該撫原奏內稱因查辦奉化匪徒一案路過紹興府接見該員感患痰疾精神恍惚等語朕思州縣等官各居本任儻非因公進省督撫勢不能與之時常接見若必待經臨該處親加察看始行參劾此外得以衰庸濫竽者諒復不少是督撫之耳目難周究不若道府之稽查較近嗣後著各該督撫嚴飭各道府於所屬州縣隨事留心訪查遇有多病廢公及庸劣無能等員立即據實稟揭儻敢瞻徇回護一經督撫查出除將各該員立予罷斥外所有該管道府一併嚴參示懲此案方聯孚身有重疾若非該撫親臨接見必致以病軀戀職貽誤地方該道府何以不行稟揭輒復委員幫辦著該撫查明參奏至督撫與州縣雖相距較遠果有所聞亦不妨將該員檄調

來省面加察看總期及時甄別斷不可意存姑息致令衰庸之員  
濫司民社以嚴考察而肅官方○是月緩徵陝西榆林府谷二縣  
貸款○是歲朝鮮越南入貢○會計天下民穀數直隸等省通共  
大小男婦四萬二千一百三十四萬二千七百三十名口存倉米  
穀三千二百三十萬一千二百十八石八斗四升八合二勺

東華續錄

道光五十三

臣王先謙敬編

臣周勳恭校

道光二十六年丙午春正月己未諭朕弟惇恪親王蘇愷尙無承嗣之人著將皇五子奕諒過繼與惇恪親王爲嗣卽襲封惇郡王並著欽天監於本年三月內選擇吉期移居府第其一應章服仍照皇子分例服用應領俸糈卽於本年春季爲始照例支領○癸亥諭前據潘錫恩奏籌備空運事宜並請定松江府屬重運渡江限期一摺當交璧昌等覈議具奏茲據奏稱松江重運幫船向與蘇屬各幫糧船跨兌必先蘇而後松又由吳淞黃浦泖湖運河遞出江連年比較遲早不過數日從無延誤况渡黃例限本定於四月初十日以前果能節節提前漸歸初限所有松江重運相距

不遠尤當爭先恐後一律過速又另片詳陳松江重運實在情形  
惟在破除積習多方激勵各等語所議自係詳加體察務協機宜  
所有松江重運渡江卽著無庸另立限期以歸簡易該督等仍當  
先事籌度嚴切督催俾早兌早開如係各幫稍形玩易立即指名  
參撤務較常年提前辦理以符例限而利漕行○丁卯諭軍機大  
臣等昨據布彥泰奏查明哈密另有可墾地畝一摺已批交軍機  
大臣會同該部議奏矣其另片所稱回子近日窮苦由於該伯克  
等科派所致自係實在情形各城回子生計本少加以科斂愈不  
聊生全在各城大臣力矢清操方能約束該伯克等顧念同類不  
至藉端魚肉此後該將軍應如何密加查察使各大臣等破除積  
習不令該伯克有所藉口著布彥泰林則徐悉心妥議據實具奏  
至該扎薩克郡王伯錫爾將私墾地畝呈獻充公擬安置民戶等

語此項地畝既據呈出一經墾種漸可擴充是否足以安置民戶  
藉資控制並著布彥泰等詳議奏聞○甲戌諭上年因派往朝鮮  
使臣向帶通官五六員恐有騷擾需索等事曾經降旨止准隨帶  
一員茲據禮部奏該國王懇請酌加以便攬接等語嗣後派往朝  
鮮使臣著准其隨帶通官二員該部卽纂入則例永遠遵行○諭  
林則徐奏請將臨陣傷亡之武弁賜卹等語甘肅永昌協把總徐  
廷貴殺賊陣亡洮州副千戶土司楊國成捕賊捐軀均著該部照  
例議卹至署遊擊薛貴之子薛瑞麟身非職官本無勦賊之責乃  
能助父打仗奮不顧身尤屬可嘉可憫著加恩照千總例賜卹○  
己卯諭三載考績大典攸關內外滿漢諸臣有能克勤克慎實心  
任事者自當甄敘才具凡庸年力衰邁者亦難姑息其閒年齒雖  
老而精力不減者亦當留任茲屆京察之時吏部將內外諸臣開

列具奏朕依次酌覈大學士穆彰阿潘世恩戶部尚書賽尚阿祁  
寯藻兵部尚書何汝霖精勤襄贊一德一心吏部尚書恩桂管理  
諸務頗見認真直隸總督訥爾經額畿疆重任諸臻妥善大學士  
四川總督寶興人品端方宣力有年協辦大學士兩廣總督耆英  
殫心竭慮坐鎮海疆廣東巡撫黃恩彤協力籌維共成枚定均著  
加恩交部議敘餘著照常供職○庚辰諭本年輪應查閱山東等  
省營伍之期山東著卽派崇恩河南著派鄂順安江蘇安徽江西  
著派賽尚阿周祖培馳驛前往逐一查閱認真簡校毋得視為具  
文○命賽尚阿周祖培查勘江南江防○壬午梁萼涵以病免以  
陸建瀛爲雲南巡撫郭熊飛爲直隸布政使周祖植爲江蘇按察  
使由安徽甯池太廣道遷○乙酉諭軍機大臣等達洪阿等奏查明上年擊  
斃番賊確數一摺並另片奏見在籌辦進剿情形等語此次番賊

復出肆搶勢甚猖獗歲暮冬寒尙復潛匿邊外乘閒搶掠一交春融必更出巢窺伺況年來近邊熟番亦有勾結尋搶情事值此天氣和暖亟應相機進剿爲一勞永逸之計達洪阿惟當認真操練修整器械以便剋期進剿毋致臨時不能得力見在林則徐駐紮涼州查辦一切不日卽抵西甯著會同達洪阿將應辦各事宜和衷商量妥爲籌辦將來布彥泰到任後林則徐仍著暫留西甯與布彥泰達洪阿公同會辦期於集思廣益以靖邊陲是爲至要○是月給奉天鳳凰城岫巖廳旗民直隸寶坻等四縣口糧貸甘肅靜甯等十三州縣災民籽種緩徵山東濱州等二十八州縣衛直隸薊州等四十二州廳縣江蘇高郵等三十三州縣衛災歉新舊正雜額賦展緩浙江富陽等十二縣水災風災通賦

二月辛卯 上御經筵○甲辰以戴熙爲內閣學士兼禮部侍郎

街由光祿寺卿遷

○壬子鄭親王烏爾恭阿卒命

皇四子奠茶酒賞銀

二千兩治喪予祭葬諡曰愼

三月戊午諭

如貴妃侍奉

皇考有年淑愼素著隨侍

慈闈

尤昭謹恪茲年屆六旬宜崇位號以介繁釐著晉封爲

皇貴妃

所有應行事宜著各該衙門察例具奏○癸亥

上啓鑾謁

西

陵○免經過地方額賦十分之三○丁卯

上謁

泰陵

泰東

陵 昌陵至

孝穆皇后

孝愼皇后

孝全皇后陵寢奠酒回

鑾○庚午

上幸南苑行圍○賞御前大臣怡親王載垣大學士

穆彰阿潘世恩黃馬褂○乙亥

上還京師

○戊寅諭我朝景運

延長雲祚衍慶避名之典我

皇祖高宗純皇帝特降

諭旨以

不經用之字改避復

諭以奕字輩以下亦可推廣此意永遠遵

行

聖謨煌煌洵爲萬世法守朕御極初年曾經降旨豫示奕載

溥毓恒啓等字缺筆書寫因念國家燕翼相承宗支蕃衍依次命名者久而愈多自宜推廣前奉諭旨援引二名不偏諱之義用示折衷將來繼體承緒者上一字仍舊無庸改避亦無庸缺筆其下一字應如何缺筆之處臨時酌定以是著爲令典俾我子孫繼繼繩繩率循罔替此旨著軍機大臣敬謹存記並繕錄二道一交內閣封貯一交上書房恭貯敬識以垂永久○辛巳諭軍機大臣等給事中安詩奏江蘇招商海運米石抵津請嚴禁關口留難需索弁役藉端擾累等語本年招商運米事屬初始自應曲加體恤嚴防流弊方於商民均有裨益若如所奏天津一路關口俱索使費並有將船扣留不准進口情事該商等寄稅外洋米石蒸變必致大形虧折以後裹足不前於民食大有關係著訥爾經額飭知長蘆鹽政及天津道查明此項米石見在已否進口如東沽等六

處俱有前項情弊立即嚴參懲辦毋許稍有擾累至進口後或一時不能銷售應由地方官按數收買亦著籌議章程迅速具奏○乙酉 上詔 黑龍潭祈雨○鄧廷楨卒以林則徐爲陝西巡撫○是月貸山西平定等九州縣歉收倉穀並緩徵保德等九州縣通賦

夏四月丁亥諭訥爾經額奏江省商米運津籌議收買一摺江省招商買米由海道運至天津售賣見據該督查明米船抵津已有數隻白米銷售甚形踴躍粳米一項議定官爲收買見已籌款辦理所有此項米石卽著倉場侍郎派委坐糧廳監督一員帶同經紀斛隻速赴天津按船驗明米色再由天津道按照市價公平收買委員分運解通以重儲備另片奏疊奉諭旨飭令嚴禁需索把持並派大員前往專司其事該督於米船進口早經飭令出示免

稅並嚴切曉諭務禁關口需索留難見已派委署天津道等嚴密訪查妥爲經理等語著該督仍遵前旨嚴飭該員等於該商曲加體恤嚴禁一切弊端如查有勒索留難等弊卽著從嚴參辦○戊子諭武攀鳳等奏臺灣漳泉民人分類械鬪匪徒乘機焚搶各案見已辦理完竣一摺此次該總兵等督帶兵勇分投彈壓由府庫提墊軍需銀七萬六千八百三十九兩著准其援照成案作正開銷其撫恤難民一項係由官紳捐辦免其造冊報銷所有捐輸官紳商民及獲犯出力之文武員弁紳士義首人等並著該總兵等酌量保奏候朕施恩○丁酉諭軍機大臣等布彥泰等奏接查雍希葉布番族實無賊蹤並酌擬約束章程開單呈覽一摺據稱總兵站柱等帶兵親至雍希葉布插帳地方詳加搜查將獻出各犯嚴加研訊絕無爲匪情形見據該總兵等擬定章程所稱該番族

等不甘身被賊名情願殺賊投效並責成盟長百戶將戶口認真稽查又買易糧茶嚴禁溢額以杜接濟等語尙屬妥協其令該番等全行薙髮一條係爲辨別釋疑起見亦屬可行惟此等番族究非內地民人可比旣經薙髮並願立功固當示之以誠而番性叵測亦不可遽加深信防範稍疏該督等總當嘉其向義之忱仍復留心查察俾不至藉稱歸化取信目前久則故智復萌又復勾結番眾再生事端是爲至要其賊匪旦曾奴勒布等仍須設法訪緝獲案懲辦庶不至仍留餘孽致滋後患也○己亥前任禮部尙書李宗昉卒予祭葬○辛丑諭軍機大臣等賀長齡奏上年永昌漢回互鬪滋事業經持平審辦其逃散回民所遺田地亦經委員分投清查不准漢民侵占並出示招回復業其不願回者酌給撫恤該回民等已屬得所詎於本年正月復有外來及永昌逃散回民

百餘人藉認種遺產爲詞求賞盤費迨經該縣理諭解散該回民等輒敢黏挂揭帖聲稱報復雪恨並邀搶客貨加以遊匪藉端冒充日聚日眾似此玩法藐官必應及時查辦免至日久蔓延見在永昌鎮道督飭府縣修城治械足資捍衛並經該督飛咨提督帶兵堵緝兼委道將馳往查拏自可剋日蒞事惟回眾甫經上年勦辦之後復敢藉端尋釁猖獗已極且滇省銅錫各廠遊匪甚多若不乘機撲滅必至勾結爲患該督惟當體察情形如果一時未能掩捕卽當親往督辦總期立時殄滅早靖邊陲是爲至要○文柱以病免以陸蔭奎爲江蘇布政使文俊爲直隸按察使由山西歸綏道遷

○乙巳命貴州編查附居苗寨客民戶口○丙午 上詣 黑龍潭祈雨○戊申雨○諭軍機大臣等賽什雅勒泰奏霍罕明巴什進額爾沁呈遞稟字並差人出卡傳送諭旨暗爲偵探一摺據稱

本年二月間有霍罕明巴什本素滿庫里遣使到葉爾羌呈遞稟  
字內稱欲抽七城貿易之巴達克山克什米爾推依博特等外夷  
貨稅並收取希皮察克布魯特租子各等語業經該大臣詳覈所  
稟各情逐層據理駁斥並撰給回諭所辦俱是惟此次所來額爾  
沁是真是僞該處夷情若何自應逐細探訪務得確情至函致開  
明阿在於該處揀派妥實可靠並熟悉霍罕地理之回子二三名  
協同前往偵探計該回子等不日即應旋回所探情形究竟若何  
務即隨時具奏毋稍疏忽

五月丙辰諭布彥泰奏遵旨察看胡超一摺甘肅提督胡超有統  
領邊疆彈壓番夷之責乃去秋由永固進兵之際輒調極遠之漢  
中官兵故爲延宕旋又停止以遂其苟安之計其遷延迂緩已可  
槩見本年林則徐密咨派兵至野馬川一帶堵截該提督又不即

行調往節次添兵並未辦有成效種種稽延畏葸咎無可辭胡超著交部嚴加議處尋議上得旨胡超著照部議革職惟念其曾經出師著有微勞著加恩仍留騎都尉世職交布彥泰差遣委用以觀後效○壬戌 上再詣 黑龍潭祈雨○乙丑諭賀長齡奏提

鎮會剿回匪連獲勝仗並查明上年辦理不善請撤銷保舉交部議處一摺此次永昌逃散回民被外來奸回煽惑糾集日聚日眾經該督咨會提督張必祿總兵蔭德布等先事準備奮勇迎剿連獲勝仗轟斃賊匪數百生擒一名並將賊首殲斃業已大挫其鋒由此跟蹤勦捕不難悉數殲除張必祿蔭德布均著先行交部議敘把總陳得功生擒賊匪追捕尤爲驍勇著以守備卽行升用在事出力員弁並著該督酌量保奏候朕施恩陣亡之署守備趙發元署都司繆志林把總趙得及陣亡受傷各備弁兵丁著一併查

明咨部照例議卹至此次回匪復事滋鬧見據生擒之馬良一犯供稱因上年按戮內應傷人過多回眾難堪是以羣圖報復是羅天池等辦理不善咎無可辭所有前經降旨將羅天池從優議敘恒文儘先補用賞戴花翎劉桂茂儘先升用補授普洱中營遊擊沈聚成拔補千總先換頂帶並賞戴藍翎之處著一併撤銷賀長齡並著交部議處○丁卯 上復詰 黑龍潭祈雨○耆英等奏委員前往香港詳加開導英國遵約退還舟山德庇時即日備文知會駐舟山兵目撤兵派船四隻赴該處載兵駛往印度前聞印度所屬之塞哥國與英國兩次構兵遣人向米利堅西洋等國探詢均稱英國上年兵敗復於本年正月間與塞哥國二次交兵得勝又據大鵬副將等探報英國復與上年構兵之馬磻國爭戰被馬磻國擊殺英兵數千及兵目四名未知確否報聞○乙亥雨○

丙子諭鄂順安奏校閱通省營伍情形一摺河北鎮標右營都司明安泰馬箭生疏該員曾經出師著有微勞著以守備降補以觀後效至所稱各州縣額設民壯隨營調考放槍准頭尙屬合式等語民壯一項原爲保護地方並雜項差使藉補兵力所不足與各營兵丁究屬不同刀矛雜技果能認真訓練已足備用毋庸兼習鳥槍弓箭著通諭各督撫知之○戊寅諭刑部奏已革職員供仍狡執請欽派大臣會訊等語刑部爲刑名總匯凡遇重大案件無不由該部酌覈究擬期協情法之平此案已革吏部司員慶文等是否聽情受賄如果悉心研鞫自可水落石出乃審訊已經數月供證仍未符合率請欽派大員會訊將來遇有疑難重案輒卽紛紛瀆請尙復成何事體此案仍著責成刑部堂官再行細心推鞫務得確情固不可失之寬縱亦不可稍有屈抑以昭慎重而成信

諭○前任湖南提督楊芳卒予祭葬諡勤勇賞銀五百兩治喪○  
是月緩徵直隸磁州等九州縣江蘇宿遷縣災歉額賦山西臨汾  
等三縣逋穀

閏五月乙酉朔諭軍機大臣等布彥泰奏查拏要犯黑錯四溝番  
族膽敢糾眾拒斃官弁土兵多名見復添派鎮將大員前往勦辦  
等語此案上年因兇賊東奴脫巴等在黑錯寺地方藏匿副將扎  
勒罕布帶兵查拏不能得力曾降旨令該督等添兵搜捕期於悉  
數擒拏茲據奏稱護副將張奉明等遣人持諭開導雖有滅勿等  
五族悔悟投誠獻出番賊科洛一名而黑錯四溝番族膽敢集馬  
步隊一千七八百人分股迎敵先後拒斃官弁兵丁數十名始終  
庇匿兇賊不肯獻出兇頑已極當經該督等派委總兵站柱等添  
帶官兵前往勦辦並派知府莊俊元等偕往會辦旋經站柱等馳

至該處勒令迅速交賊詎該寺僧先後交出賊犯六名均非指名勒交之要犯迨該鎮等進勦至那沙莊滅力迭二莊該番眾仍敢持械抗拒似此兇頑不法必應痛加勦捕此時既已厚集兵力該督等卽應嚴飭鎮將大員攻其要害殲厥渠魁其主謀糾黨之兇徒總當悉數就擒斷不准因零匪交出輒卽將就了事務令該番族等知畏知懼不至再貽後患○癸巳諭軍機大臣等賀長齡奏回匪屯聚親往督辦並委署撫藩各篆一招永昌回匪於前次被勦之後乘夜潛遁聚集猛庭經該提鎮移營尾追該匪等輒敢踞險相持並疊次撲攻營盤該提鎮督兵迎擊始行敗退惟山深箐密屯聚尙多非厚集兵力分路圍攻難免竄逸見屆暑雨之期煙瘴將作若再遷延不獨經費多糜且必日久生懈該督已添調弁兵親往督辦著卽相機籌度策應督催並嚴飭在事人等確探賊

蹤迅卽分途進剿斷不准稍存姑息之見再致蔓延儻該文武等  
稍存觀望卽著據實參辦其在事出力者亦卽奏請恩施此次傷  
亡各弁兵著一併查明咨部照例議卹○丙申撥山東曹州右營  
經制外委一駐濮州水堡集中營千總一駐鄆城縣移鄆城縣經  
制外委駐黃姑巷均添兵隸之並添濮州及觀城縣馬守兵額○  
丁酉諭前因兵部議覆璧昌請於三江口等處設立鹽捕專營恐  
日久不得其人仍屬有名無實等語會降旨令賽尙阿等親往履  
勘覈議具奏茲據奏稱親至其處察看霍家橋實爲揚州切要門  
戶添設專管不特鹽務賴以緝私兼可爲揚州保障且添兵之難  
在於籌餉業經查據該督切實聲明可以永久不動正項其事自  
屬可行著准其於霍家橋添設鹽捕專營員弁兵丁如數增添所  
有俸餉等項旣據該督稱於鹽務籌撥卽著免其造冊報銷但必

期行之永久儻日後偶因經費短絀奏請借動別項亦斷不能倖邀允准至運司緝私是其專責若不兼轄武職亦恐呼應不靈該督所請加運司兵備兼銜之處並著准其兼銜以資制馭他省不得援以爲例其新設官兵仍責成該督督飭運司認真巡防訓練隨時考覈期於兵歸實用餉不虛糜毋致日久視爲具文○戊戌命端華襲鄭親王爵並在御前行走○調柏葰爲戶部左侍郎轉惠豐爲吏部左侍郎調福濟爲吏部右侍郎明訓爲工部右侍郎以慶祺爲盛京戶部侍郎由左副都御史遷○是月展緩浙江定海廳新舊額賦

六月甲子以靈桂爲左副都御史由通政使遷○丙寅諭布彥泰奏官

兵勦毀番莊匪族四散酌量撤兵一摺所辦可嘉之至該處番族眾多素稱犷悍出巢肆搶歷有年所從前總督提鎮等辦理番案

一味因循遷就敷衍了事以致該番族等習爲故常肆行無忌此次黑錯寺地方番族恃強抗拒經該督等示以兵威添調官兵帶領進剿經過番莊隨燒隨進連斃多名該匪等復有馬隊迎敵復經分爲兩翼夾擊中路官兵用大礮擊斃執紅旗番賊該匪奔竄逃命連日逐一排接並無賊番蹤迹見經查拏餘匪緝捕漢奸酌量撤兵辦理尙爲迅速布彥泰林則徐調度有方達洪阿身先士卒不遺餘力均著交部從優議敘在事員弁著擇其尤爲出力者據實保奏傷亡兵丁著交部照例議卹○丁卯諭步軍統領順天府府尹並各督撫飭屬緝拏邪匪○庚午改建廣東九龍山石城○壬午以予告大學士阮元重赴鹿鳴晉太傅予食全俸○命前任漕運總督朱樹以原品休致○癸未諭布彥泰等奏黑錯寺敗竄賊眾聚匿果岔之險隘地方復經官兵搜捕殲擒大獲勝仗一

摺黑錯寺番匪抗拒官兵前經達洪阿帶兵攻剿焚莊毀寺業已  
大振軍威詎該逃匪等仍敢竄匿果岔地方希圖有險可踞復經  
達洪阿督帶精兵窮追奮擊塢蕩窩巢計該處烏合數百之眾業  
已殲擒殆盡見在拉布楞等寺僧眾收合四溝散亡番族帶到營  
盤匍匐乞命經達洪阿宣布皇仁嚴行條約准令悔過自新官兵  
卽日凱撤所辦可嘉之至達洪阿著賞戴花翎所有在事出力人  
員著該員等擇其勞績較著者酌量保奏候朕施恩護副將張率  
明奮勇爭先以致頭額被槍殞命臨陣捐軀殊堪憫惻加恩著照  
副將陣亡例賜卹其陣亡及受傷兵丁並著照例咨部分別卹賞  
餘著照所議辦理又諭布彥泰奏請將勦番不力具稟告病之總  
兵交部嚴議一摺所參甚是西甯鎮總兵站柱前經該督派往黑  
錯寺督勦番匪該總兵並不認真攻勦輒私遣人先往關說並以

干總楊正才等赴寺質換其頭目來營一見卽謂爲悔懼投誠辦理已屬顛預迨番族獻賊寥寥該總兵轉置主謀糾黨之兇徒於不問僅將弱小之那沙滅力迭二莊攻打卽請撤兵歸伍顯蹈從前將就了事惡習怯懦無能可恨之至見因達洪阿等勦焚莊寺大振軍威該總兵輒行告病希免參劾實屬孤恩溺職站柱無庸交部嚴議著卽革職發往烏嚕木齊效力贖罪以示懲儆○諭奕湘等奏接據朝鮮來咨嚴禁江邊蓋房墾地查拏究辦一摺內地與朝鮮交界之處前已有旨不准民人私越邊界墾田構舍果能認真查禁何至甫越三四年仍有民人潛往結舍墾田之事可見從前辦理各員不過奉行故事全未實心查察所有禧恩及派往接查之統巡總巡並邊界各官俱著先行交部嚴加議處仍著奕湘等遴派明幹之員帶同兵役分路前往嚴密搜查將各犯按名

擊獲究辦並將草舍田土全行平毀不准仍留寸椽尺地儻查明  
原定章程本未詳盡以致二十二年以後在事各員不能認真辦  
理再著據實嚴參候旨懲處毋得稍有諱飾至嗣後應如何設法  
查禁不至再有奸民偷越之處均著悉心籌議具奏○是月緩徵  
山西徐溝縣雹災河南安陽等十四縣旱災山東臨清等三十八  
州縣旱災風沙災新舊額賦